

欽
定
全
唐
文

欽定全唐文卷八百十二目錄

劉崇望

授翰林學士鄭延昌守本官兼中書舍人制

授中書舍人崔凝右補闕沈文偉並守本官充翰

林學士制

授鄭紹業工部尚書制

授前峽州刺史李授光祿少卿制

授陵州謝瞳兼御史中丞前舒州司馬倪徽端州

刺史制

授王搏檢校殿中侍御史充義成軍節度推官制
授張道蔚朔方節度供軍判官隴州防禦推官李
融宏文館校書郎充職等制

高銳奏從事陳璩等三人授官制

加外藩佐僚郎等將制

授侯蘊贊善大夫李仁誨棣州長史蘇汾坊州長
史制

授楊鎰西水縣令張廷濟永清縣令盧軫新鄭縣
令孫球下邳縣令等制

授楊宏範郿縣令制

授薛璫新鄭縣令賈希弼汧源縣令李牢麟遊縣
令等制

授楊彥奉國縣主簿尚殷美萬歲縣主簿制

授掖庭局丞賜緋張嗣復內局令判內僕局丞制
授孫可讓內僕局丞制

授奚官局丞上柱國西門廷暉掖庭局丞制

授儒林郎內府局丞賜緋魚袋楊復隨給事郎行
內侍省奚官局令制

中書舍人苗深母瑯琊郡太君王氏封瑯琊郡太夫人祠部郎中知制誥張文蔚母扶風郡太夫人蘇氏封馮翊郡太夫人等制

石門扈駕功臣六都指揮使檢校司空孫德威母博陵崔氏封博陵縣太君制

劉處靜

洞元靈寶三師記序

元墟墓誌銘

高漢

呂用之罪狀疏

鄭仁表

左拾遺魯國孔府君墓誌銘

并序

裴樞

建石室以藏神主議

許棠

唐故浙江道五部兵馬大元帥平南節度使銀青

光祿大夫檢校尚書令戴公墓誌銘

并序

馮贇

雲仙雜記序

樂彥禎

致太原汴州兩鎮書

鄭嗣昌

建尊勝幢記并讚

周繇

夢舞鍾馗賦

欽定全唐文卷八百十二

劉崇望

崇望字希徒河南人邢國公政會七世孫咸通十五年登第累遷司勳吏部二員外郎僖宗時擢翰林學士遷戶部侍郎承旨轉兵部昭宗卽位進中書侍郎同中書門下平章事大順初爲門下侍郎加尚書左僕射代時溥爲武寧軍節度使溥拒命還爲太常卿王行瑜入誅執政貶昭州司馬行瑜誅召爲吏部尚書徙兵部光化二年卒贈司空授翰林學士鄭延昌守本官兼中書舍人制

勅以爾影纓著稱夢筆爲文富以美才披其禁闥典由中之詔成布下之言方謂得人雅當入侍蓋聞羊祜謀議是草皆焚周仁重厚其言不泄親近之地慎密爲先爾旣不能何爽居外西省亦吾教誥之地戒之可矣可依前件

授中書舍人崔凝右補闕沈文偉並守本官充翰

林學士制

勅具官崔凝等凡帝王有應制侍從之人蓋思其朝夕匡益也下詔先視質疑如流茲所以潤色出言交修發號大漢氏設玉堂內署開金馬外門得人甚多斯道大振顧是

眇末敢忘師虞職思其流以備左右俄聞家遺清風人懷
恭德能濟其美者伊凝有之三代絲綸一門冠蓋不墜其
業者伊文偉有之而皆以墨妙詞芬策名試第謙無矜物
敏以適時周旋鳴玉之儀頡頏攀雲之路訪於執事亦進
厥良真我雍容之列所宜者也敬承密命允叶同時可依
前件

授鄭紹業工部尚書制

勅具官鄭紹業族掩五侯家多萬石盈數大名之後高門
陰德之餘茲實生賢聿來佐國而勵精士節炳煥人文韻

宇宏深智度恢廓比博能於武庫方俊德於神鋒終始令
圖出入大任丹墀絳闕自風體而宏多起草掌綸由天才
之足用洎揚我休命出守荆門頗聞理聲急於徵請入則
思邦家之久計出則擁旄節之上游良佇忠貞乃期康濟
爰從分務曠已厯時如聞舒不疚之懷安無怨之地雖有
簞瓢之樂寧無憔悴之容能用善人我實所慕是命進爾
於冬官八座乃庶績彝倫之所由焉祇若朕言克邁乃訓
授前峽州刺史李授光祿少卿制

勅近出天屬富有吏能進士以來恪勵無替覽宗正列狀

念夷陵當官公舉何多獎用宜及仍聞罷退曠有歲時誠
曰任能亦旣振滯光祿古官也而比朝於今兼掌九重是
命爾司少其事勉幹吉蠲之職無忽禋祀之官可依前件

授陵州謝瞳兼御史中丞前舒州司馬倪徽端州

刺史制

勅某官謝瞳等欽惟漢宣帝以英主御無事之朝尚思良
二千石以之共理伊予冲昧適丁艱難每以一麾假人旣
重且慎每聞謝瞳以勇誅暴而去害以義利物而移風儻
願得之於一年宜用試之於千里聞爾倪徽久從進宦皆

著任能委以方州冀爲良牧吁舍哺鼓腹是安人之謀雷
犢懸魚乃潔已之操惟一二之事皆古之賢刺史所行以
爲爾資庶洽予意有以憲丞寵官攝之任貂璫遷刺史之
班予於疲黎無所愛惜吁往哉可依前件

授王搏檢校殿中侍御史充義成軍節度推官制
勅王搏名以文舉祥以履光敬以交人善爲知己鐵鉞開
幕台鉉奉藩方虛婉婉之籌乃顧翹翹之乘能不輟我周
袞之任樂爾漢相之徒建禮部郎官惠文御史敬思寵數
勉罄嘉猷可依前件

授張道蔚朔方節度供軍判官隴州防禦推官李

融宏文館校書郎充職等制

勅張道蔚等糧餉其軍防虞所理况自邊徼必資強能是
命擢以校文寵茲佐畧宜思績効無忝從戎可依前件

高銳奏從事陳璩等三人授官制

勅高銳等旣以勤心定賓主之分宜頒嘉命爲官屬之榮
同參執法之司勉副知人之地期將盡力共贊成功可依
前件

加外藩佐僚郎等將制

勅具官某等或游徼罷居堙鬱彈冠之望或指揮効用周旋免冑之行幹以奉公恭而事上允當選舊亦旣賞勞禁旅親營實在將軍之令雄藩武帳宜增列校之威各命寵遷勉成茂績驟升郎佐無忝官勞可依前件

授侯蘊贊善大夫李仁誨棣州長史蘇汾坊州長

史制

勅某官某等或以忠勤彰於侯正或以奏獻著彼勞能况侯蘊李仁誨親奉禁營始陪輦路不有遷命將何勸人可依前件

授楊鎰西水縣令張廷濟永清縣令盧軫新鄭縣
令孫球下邳縣令等制

勅昔魏郡十五城獨繁陽有異政漢史書之以其爲縣之
才未易得也今我擇官憂人之際一朝以難得之才待鎰
等四子其何如哉將責試功亦宜申命爲政如御不可改
轍而行爲政如農惟在勤思其事無或窮人使爲盜也書
稱以庸本朝旌賞遽以印綬光命之球蓋延餘師溥之所
舉乃爲之酌當務其實可依前件

授楊宏範郿縣令制

勅楊宏範能以下位伸於上聞諒屬驅馳不避繁劇郿大邑也有民人焉勉揚仁風無辱公舉可依前件

授薛璫新鄭縣令賈希弼汧源縣令李牢麟遊縣

令等制

勅薛璫等我聞焦贛之伺奸邪虞詡之推盤錯皆屏盜之迹爲治縣之先盜旣不興縣是用保今其時也勉思齊之其於政之善惡人之理亂賞罰甚明足以自擇璫得銀章無忘兢惕

授楊彥奉國縣主簿尚殷美萬歲縣主簿制

勅楊彥等主簿之官大要在其勾稽一同百里不亦難乎
無言小官而忘幹事黜陟勸沮勉自爲謀可依前件

授掖庭局丞賜緋張嗣復內局令判內僕局丞制
勅具官張嗣復性推端慎才任公方居爲勵已之能動有
逸羣之度爰當職局備覩通明諒此精修諧於擢用是命
伸其寵獎延以上司俟典幹之繼聞顧優崇之何遠敬思
勉勵跂乃騰翔可依前件

授孫可讓內僕局丞制

勅孫可讓才質相高謙和特立秉端正恭敬之禮備起居

左右之勤入用甚優前途更遠實諧獎進俾列官司勉副寵榮無忘夙夜可依前件

授奚官局丞上柱國西門廷暉掖廷局丞制

勅廷暉出入禁門周旋賓地恭敬之心無失公忠之節愈明必有才能可當委用勉荷特遷之命宜思與進之途可依前件

授儒林郎內府局丞賜緋魚袋楊復隨給事郎行

內侍省奚官局令制

勅具官楊復隨資於周敏濟以器能居廣衆而和光列禁

司而幹務播於公議實曰上流諒檢操之不渝顧津途而
莫測允承嘉命勉副寵遷無違恪恭以就光大可依前件
中書舍人苗深母瑯琊郡太君王氏封瑯琊郡太
夫人祠部郎中知制誥張文蔚母扶風郡太夫
人蘇氏封馮翊郡太夫人等制

勅具官苗深等母瑯琊郡太夫人王氏等本於仁原於禮
保於和處於順故圖史素學風法不衰立我彥臣率由貞
訓而識者服儒之道不使忿言加已以羞其親深與文蔚
有之矣乃子弟謹身之行履危懼辱之思以承其志渙等

有之矣且皆賦祿於朝相戒以養俾榮報德當貴疏封慶
集而家數行吾國古之孝理不在茲乎可依前件

石門扈駕功臣六都指揮使檢校司空孫德威母

博陵崔氏封博陵縣太君制

勅具官某母崔氏夫爲人者能以忠勇之謨勞於國戎旅
之權旣重上公之秩乃高而母氏之樹寵章未稱則於王
化有所不宏方屬推恩是以用典以光孝養且厚勲臣可
依前件

劉處靜

處靜居天台山自號天台耕人會昌中與葉藏質應夷節
爲林泉友

洞元靈寶三師記序

道之體也至靜而無爲道之用也通生而赴感始乎無始
先乎無先起於妙無而生妙有至真之教由茲而立焉我
元始天尊啟重元歷五太握元化運真精總括妙門以爲
法印付於大道君道君繼統以光大之敷暢以宣布之凡
十二印包舉幽蹟窮達元妙以授於老君老君奉而行之
上極三清旁周無外綿亘億載開導未聞帝帝爲師方方

立教幽明巨細靡不宗焉自是奕葉紹承師師授度上自
元始下逮茲辰故受道尊奉其爲度師乎度師之師曰籍
師籍者嗣也嗣籍真乘離凡契道籍師之師曰經師經者
由也由師開悟捨凡登仙三師之重婉於祖宗祖宗能傳
之而不能使兆致道父母能生之而不能使兆昇仙奉師
之道無以過矣儒家在三之義莫能及焉欽惟三君煥有
明德追仰尊稟瞻慕無階粵自上賓未列圖紀雖貞猷茂
範刊勒於名山而後學門人難披於真輿敢條實錄昭示
將來輒陳小序仍爲頌述道弟吳興陸甚夷已敘道元先

生休烈但繼裁短讚以紀德風庶刼厯有終而清規不泯
有唐龍集庚辰中元日甲辰序

元墟墓誌銘

余源承大漢派衍東甌家於縉郡之遂昌鄉居樓得里住
溫恭世奉儒宗不求聞達心存畎畝性好林泉知數知斗
讀易問禮將期升粟以養甘脆因澤畔持竿有傷於吞餌
林間設網乃誤於罝羅况才匪經邦術無清世知艱而退
自保逍遙乃滌去紛拏歸心沙泊宅身雲岫遊神窅冥經
諷五千籙遵三洞陟天台而躋華頂望滄海而睇神州眺

賜谷而對扶桑吸雲霞而吞紫氣因還故里息爾仙都探
安期之舊蹤封軒皇之故跡鍊金溪畔足以濯纓縉雲山
中允養志因斯考室宕漾養真性甚疎慵修習不至樂
天知命一任自然年踰從心安得長久不敢比歌於梁木
輒思記過於明夷升騰何期歸土有日預築元墟將爲永
室時唐咸通十四年歲在癸巳六月甲午二十八日辛酉
寅時遭疾卒於前齋當日歸封元墟春秋七十有三其銘
曰

虛皇降氣大化凝真自合長久胡乃沉淪修習不至存思

不勤三魂高邁七魄下湮此必然之期有始有卒生無益
人死何勞神預備塋木以掩形質臭莫薰天屍無露日人
皆好生誰不惡死賢愚悉然高卑盡爾日月長焉陰陽定
矣物有興亡余今休止隱真東臯卓元孤墳高峯映漢聳
木干雲烟霞杳靄猿鶴續紛慮川移而谷變乃自作於斯
文

高渚

渚駢之從子官左驍騎大將軍

呂用之罪狀疏

呂用之誑惑尊德塗炭生靈奸僞之名遠近誼沸內則以
神仙之事苟媚一時外則行節制之權取怨百姓大將則
畏死不說從事則尸祿求容荏苒數年寢成大蠹則克邪
以露羽翼將成若不誅之恐高氏勲庸一旦爲此所累

鄭仁表

仁表字休範宰相肅孫登第後從杜審權趙隲爲華州河
中掌書記加殿中侍御史內供奉與劉鄴有隙鄴爲相貶
死嶺外

左拾遺魯國孔府君墓誌銘

并序

咸通十五年三月侍講學士右僕射太常孔公以疾辭內署職其元子左拾遺養疾亦病逾二旬太常公疾少間拾遺疾亦間又旬日太常公薨拾遺哭無時後七十六日亦終嗚乎求諸古未聞也仁表與拾遺同歲爲東府鄉薦策第不中等再罷去明年偕宴於東堂宴之日博陵崔公薨出紫微直觀風甘棠下表爲支使校芸閣書拾遺始及第乞假拜慶新進士得意歸去多不伏拘束假限往往關試不悉集貢曹久未畢公事故地遠迨二千里例不給告時僕射太常公節制天平軍以是勤不得請拾遺曰人之多

言必以我爲宴安訖春不宴年少乘喜氣赤春頭竟不對
狎客持一杯酒人以爲難關試日都堂中揖別同年徑出
青門外經所爲從事州入院判案十日東去府適罷賢諸
侯爭走羔雁馳弓旌竟不能致徵爲渭南尉直宏文館久
之會大學士出將竟不就僕射太常公罷鎮居洛中拾遺
伏安定省不嘗言仕宦旋以萬年尉復怙文職無西笑意
僕射徵拜司戎貳卿拾遺由侍行乃赴職越一月今許昌
太傅相國襄陽公爲河中奏署觀察判官假監察御史故
事赤尉從相府得朱紱公昆仲間有未至者求裏行官不

改服色人人美譚之俄轉節度判官從知之道皎然明白
和而不柔守而能通內盡匡補而外若不知相君待之異
禮俄拜左拾遺內供奉嗚乎止於是何也春秋始卅三矣
惜哉公至性自生知雖欲全其禮傳於後開強忍抑不能
俯就始得疾不言於人因晡哭若絕左右始知有病句甚
矣句卧堊室中不復進饘餌疾益亟方肯歸常所居舍悉
召骨肉迨僕使唯言僕射公葬時事指揮制度必以古禮
戒誨約束委曲備悉左右皆泣公曰吾平生無纖小不是
事天報我甚厚使亟得歸侍地下爾盍賀而返以泣耶吾

自遂性不能無傷生全大孝送終設祀宜益儉削無以金鉛纖華爲殉無以不時之服爲殮吾幼苦學尤嗜左氏傳所習本多自讎理宜置吾左右友人鄭休範多知我所執守相視若親弟兄我亦常以所爲悉道之請以誌我彼不能文必盡其實言竟撫弟妹若將千百里爲別者視妻子若將一兩夕不面者而怡然其容如有失而復得已而終嗚乎其善歸侍乎公謝世之月餘日前與二季處暗室中忽援毫書廿八字於室內東展之上若隱語而加韻焉曰許下無言奪少年震而不雨月當弦風濤渭逆舳艫沒從

此無舟濟大川初玉季載考其義莫究指歸旣痛絕手足
若洗然而悟曰許無言是午字今歲在午也震不雨是辰
字其哀瘵至甚移歸院就醫是辰日及奄然之日驗於官
厯是上弦日又應月當弦之讖也吁似有所潛受於冥昧
間何懸知之若是也憶於洛陽里第始相與定交公曰何
以契我余曰死患難先祿位託孤寄命同休共感此義交
也見善相勉也見利相遠也言之而必行守之而必固一
旦離此則攻而絕之使處世爲匪人歿身無怨言斯益友
也余將與吾子契之自是過必相攻善必相激相成如恐

失相畏若臨敵雖朝夕共行止人不以爲朋比亦君子之
能賢善誘也嗚呼公之文之學之精明道行如雷聲日光
無耳目者則不知也公之訃始聞人人如有亡碩生鉅賢
心死氣脫道之不行也天何心焉公諱紆字持卿魯司寇
四十代孫繼繼承承世濟不墜間生傑出磊落相望曾祖
岑父皇任秘書省著作佐郎贈司空祖幾皇任禮部尚書
致仕贈司徒父溫裕皇任檢校右僕射兼太常卿充翰林
侍講學士冊贈司空皇妣河東薛氏族大而顯先司空廿
八年卽世公娶京兆韋氏山東清甲家也有二子男曰鐵

婢始十歲甚肖似憶與公約生子命名必如兄弟愚之子
曰後魯他日鐵婢當以還魯字之易云積善之家必有餘
慶善之教必闡於道儒釋釋固無嗣皇家公家道儒之餘
慶也公又賢而無祿其後益大以昌女少於男銘曰
嗟嗟夫君嗟嗟夫君孔聖遺允顏回後身高高者天幽幽
者神幽幽不見高高不聞不見不聞又何足以云云

裴樞

樞字紀聖絳州聞喜人咸通十二年進士再遷藍田尉直
宏文館從僖宗入蜀擢殿中侍御史龍紀初進給事中改

京兆尹出爲歙州刺史遷右散騎常侍以戶部侍郎同中書門下平章事罷爲工部尚書出爲清海節度再知政事累進右僕射諸道鹽鐵轉運使哀帝時忤朱全忠意罷政事拜右僕射貶登州刺史又貶隴州司戶參軍至滑州全忠遣人殺之白馬驛投尸於河年六十五

建石室以藏神主議

禮之必立宗子者蓋爲收是族人東嚮之主亦由是也若祔於遠廟無乃中有一間等上不倫西位常虛則太祖永厭於昭穆異廟別祭則祫享何主乎合食永闕比於姜嫄

則推祥禱而無事於禮夫親親故尊祖尊祖故敬宗敬宗故收族收族故宗廟嚴宗廟嚴故重社稷由是言之太祖之上復有追尊之祖則親親尊祖之義無乃乖乎太廟之外輕制別祭之廟則宗廟無乃不嚴社稷無乃不重乎且漢丞相韋元成請瘞於園晉徵士虞喜請瘞於廟兩階之間喜又引左氏說古者先王日祭於祖考月祀於曾高時享及二祧歲禘及壇墠終禘及郊宗石室是爲郊宗之上復有石室之祖斯最近矣但當時議所處石室未有準的喜請於夾室中愚以爲石室可據所以處之之道未安何

者夾室謂居太祖之下毀主非是安太祖之上藏主也未
有卑處正位尊在旁居考理卽心恐非允叶今若建石室
於園寢遷神主以永安採漢晉之舊章依禘祫之一祭修
古禮之殘缺爲國朝之典故庶乎春秋變之正禮動之中
者焉

許崇

崇字文化咸通末進士

唐故浙江道五部兵馬大元帥平南節度使銀青

光祿大夫檢校尚書令戴公墓誌銘

并序

府君諱昭字德輝姓戴氏其先杜陵人也裔出周卿佚之後業勲承家軒冕繼嗣祖諱非字名章志秉松筠迹疎名利高尚之德聰明之資父諱宏字仲廣學宗儒術德越前修惟府君罄誠節以奉公負溫和而治衆婚隴西鄭氏備集閨儀包含淑德府君爰自咸通元年逢黨裘甫叛自富陽竊持朱旆都督王式遣團練押衙雲公思益統領銳師誅夷蜂蠆趨於槃水陟彼高岡府君以奮節雄之括於私第啟帑藏之資發倉廩之糧獻以奇謀饋以營壘而元克投戈羣黨請命雲公感府君以精才懋畧德誼加人遂爲

上陳請甄前功然承寵渥旅列轅門後時草寇周了髻剽
刼武義浸聚羣凶王郢悖亂狼山深乘巨艦當其征戍獲
息妖氛況又頃歲黃巢之衆鼓譟驚天雲旗蔽野巨魁旣
攻鄰郡輕騎復剽茲邦宣歙觀察使崔珪知府君負三畧
之材蘊六韜之術遂遣簡練精旅防虞浣溪纔展征車俄
奔困獸粵奉察兼八政累承寵錫一同擢以班榮制於鎮
轄而元勛益著妙畧潛施後有順節者團練押衙文堂久
逭刑章一朝面縛雖從惠化尚叶姦回去載中春構逆於
府垣之下脅從於營壁之間遽率凶狂欲趨陶嶺而躍臨

境感於畏威竊危忘軀遂由間道府君親持矢石赴隴泉
大呼而山樾掃清匪日而妖禽薄滅洎於秋八月台嶺劉
文之暴奔趨鏡水之濱府君挺南面之戈矛輔雄藩之籌
畧始張貔虎之旆已懾萑蒲之羣顧勛業之無儔實古今
之可冠遂鎮撫水統以雄師境內莫不澄清汰除姦蠹者
也凡挺節驍雄之士咸舛望其趾焉自厯踐崇列詔榮故
邦當忻孝養之隆深限幽明之阻嗚乎享年五十有八中
和二年八月二十日寢疾終於陶朱鄉里之私第以其年
十二月十六日葬於當縣靈泉鄉溫泉里斗泉之源也有

子四人長曰惠材益懋華志用踰倫弱冠征戎羣心企踵
次曰堂去載劉文蟻聚亦跳戰於鏡濱恩渥存臨轄於茲
嶺嘗飲水以厲已無遺蘖以畱後慷慨爲時操持自遠婚
於平陽霍氏次曰忠曰闕皆素業前傳清規是守時方幼
歲器用踰倫有女三人長適高陽左氏肅雍婦道敬戒閨
儀次方問名於盧氏次卽閨室未違淑德咸備其餘親親
勲統不復一一繁紀也今則卜此重岡松蘿擁藹伏慮年
代寢遠陵谷改更命於斯文刊於貞石以紀誌之銘曰
太華磅礴將積陰陽七政無息百齡有常英雄峻節令譽

彌芳挺身報國奮劍安邦繼臨寵渥以起輝光元勛特立
妙畧九彰豈期微疾俄歸墓鄉闔營悽慘里巷悲傷卜兆
靈野扃仗泉鄉素月皎皎寒松蒼蒼一窆元戶永祚遐昌

馮贄

贄金城人

雲仙雜記序

纂類之書多矣其間所載世人用於文字者亦不下數十
輩則今未免爲陳言也予事科舉三十年蔑然無效天祐
元年退歸故里築選書室以居取九世所蓄典籍經史子

集二十萬八千一百二十卷六千九百餘帙撮其膏髓別爲一書其門目未暇派別也成於四年之秋由急於應文房之用乃不能詳又數歲復得終篇者四部英華筆頭飛文壇戈戟應題錄皆傳記集異之說若見於尋常之書者此必畧之庶兵火煨燼之後或者不至束手豈小補歟同志者幸爲珍秘之天復元年十二月馮贇序

樂彥楨

彥楨魏州人少爲本州軍尉歷博州刺史遷澶州魏博節度韓簡死以檢校工部尚書領畱後進節度使中和四年

累加尚書左僕射同中書門下平章事僖宗自蜀還加開
府儀同三司再拜司徒子從訓之亂爲亂軍所殺

致太原汴州兩鎮書

光啓三年正月五日魏博陵節度使開府儀同三司檢校
司空同中書門下平章事樂彥禎謹齋戒三日致書於二
鎮足下蓋聞天生蒸民而樹之君以司牧百姓主握二柄
禮樂征伐之所興勅寇奸雄之所懼是以大君有率臨之
典羣后承專制之權內守憲章外憑教命其或大盜移國
黎民墜塗身居戎閫之榮手綰兵符之重傍觀喪亂坐俟

危亡旣虧社稷之謀又失子孫之計此亦義夫之所慷慨
烈士之所咄嗟敢以狂愚伏陳英悟伏以我國家啓運開
國承家創基三百春秋億兆臣妾自羣凶蟻聚中寓土分
乘輿奔走於道途宗廟荒涼於草莽今者監國雖立朝綱
已頽皇祚莫知其所安蒼生莫知其所訴天子之威不能
加四海諸侯之力不能保一方弱者危而强者吞雄則飛
而雌則伏竟亦身殞名滅國家破離咸有其繇取鑒非遠
大約以諸藩捨本就末忘義背盟謀不相從言不相信國
是以間敵繇此興與其俱亡曷若共霸論桓文之事則人

未敢先爲魯衛之邦則誰爲不可是以研詳典故揆度事
機輒敢指陳庶裨權畧今者秦宗權起於纖蠹漸恣狂鋒
南苞荆襄北跨河雒屠城拔邑暴物害人使父子不得相
全夫妻不得相保血肉塗地荆榛蔽天不織而衣人之衣
不耕而食人之食凶酷之甚古今所無竊據要津下視諸
鎮而又河東軍擁旌重地受國深恩稔宴安以未移縱貪
婪而不息奄有上黨又吞覃懷張皇威聲凌脅蕃屏皆蓄
併吞之志盡懷僭大之謀非謂未萌已觀成釁况孟津之
衆尋驗保姦汝水之戎果明濟惡仍且海內皆困河南盡

饑切料凶狂倍生窺顧若不早爲之計必慮悔不可追非
宜坐以俟危拱而受制或一隅失所則諸鎮可虞唇旣亡
而齒必寒皮不存而毛安附而從事始先度禍胎將去本
根要傾巢窟况大河之內常山之陽東極海隅北亘蕃部
奧壤如砥列城似林億萬衆之甲兵百千羣之鐵馬建牙
樹屏仗鉞分麾周封者盡是賢侯漢拜者莫非名將彼唱
此和連衡合從豈能西不如太原南不如蔡賊非惟可恥
誠亦堪悲蓋繇久屬昇平素無交結慮爲姦人鬪謀或置
鄰道猜嫌思我同心共爲永計今請常山太尉幽州司空

荊州司空滄州畱守常侍各命至親兒姪或弟兄二人擇地築壇卜日赴會嚴修齋戒虔告神祇歃血誓詞藏之盟府然後以茲五鎮共爲一家有事則同謀有征則同舉扶持王室掃蕩賊臣收陷失之土疆開朝貢之道路其爲大義莫尚於斯謹請當道李山甫判官奉書陳請呼天告盟指日爲誓虔聽明命以行壯圖社稷幸甚生靈幸甚

鄭昌嗣

昌嗣乾符時人

建尊勝幢記并讚

昭然大唐明聖文物之代符堯舜垂衣之治者蓋我后以天下爲一家西涉流沙南盡北戶東有東海北過大夏人跡所至無不臣者行禹湯罪已之道荷聲明之大業不拓土不開疆烽燧弭徹干戈載戢海外有截中夏晏然無繁賦無勞人慰弱省刑鰥寡孤獨各得其所生物遂其性者蓋闕二字敷布德被遐邇所及也然後顯佛禮崇釋門無賢無愚咸知虔信遂使水不爲沴旱不爲災歲不至大侵寇不嘗小起我之帝德也我之佛力也時之感致也斯邑也有邑人劉初昇等敬善彌堅雖匹夫不可奪志私願首舉

響應其言中無難色者是向道不迴矣遂立佛頂尊勝陀
羅尼經幢并座高參拾尺幢之建也力非富工非抑饋給
者不以疲爲辭負販者不以利爲恡大哉神通有是化也
力旣就矣功旣成矣永願淨除妄想超越一切聲聞緣覺
觀如來不可思議就精進及心慧智離陰界入解脫識相
求漸淨非頓之門受安樂具足之福曉四禪逾九地得无
生之妙法決大乘之深教祿壽霑霑精進不怠冀瞻部之
苦共登羅之因聊紀歲時用彰不朽讚曰

有漢興教有唐彌遵厥典昭彰化萬代人惡不染著善證

果因蠢蠢羣生同霑影塵其解脫煩惱有陀羅尼咸生淨

土受大慈悲桑田可變陵谷可移惟茲立石鎮古巍巍

周繇

繇字爲憲池州人咸通十三年進士調建德令辟襄陽徐
商幕府檢校御史中丞

夢舞鍾馗賦

以德至前王始
觀神跡爲韻

皇躬抱疾佳夢通神見幡綽兮上言丹陛引鍾馗兮來舞
華茵寢酣方悅於宸扆不知爲異覺後全銷於美疢始訝
非真開元中撫念齊民憂勤大國萬機親決於宸斷微瘡

遂沾於聖德金丹術士殊乖九轉之功桐籙醫師又寡十全之力爰感神物來康哲王於時漏滴長樂鐘敲建章局禁闔兮閉羽衛虛寢殿兮闐嬪嬙虎魄枕欹象榻透熒熒之影鰕鬚簾捲魚燈搖閃閃之光聖魂惝恍以方寐怪狀朦朧而遽至砵砢標衆顛顛特異奮長髯於闊臆斜領全開搔短髮於圓顙危冠欲墜顧視纔定趨蹌忽前不待乎調鳳管揆鸞弦曳藍衫而颯纒揮竹簡以蹁躑頓趾而虎跳幽谷昂頭而龍躍深淵或呀口而揚音或蹲身而節拍震雕拱以將落躍瑤堦而欲折萬靈沮氣以懔惶一鬼傍

隨而奮躑烟雲忽起難畱舞罷之姿雨雹交馳旋失去來
之跡睿想纔悟清宵已闌祛沉痾而頓愈痒御體以猶寒
對真妃言寤寐之祥六宮皆賀詔道子寫婆娑之狀百辟
咸觀彼號伊邠亦名鬱壘儼祆於凝沍之末驅厲於發生
之始豈如呈妙舞兮薦夢明君康寧兮福履

欽定全唐文卷八百十三目錄

陸希聲

唐太子校書李觀文集序

道德真經傳序

北戶錄序

周易傳序

君陽遁叟山居記

仰山通智大師塏銘

紇干濬

金史卷之三
贈太尉韓允忠神道碑

公乘億

復河湟賦

魏州故禪大德獎公塋碑

唐太師南陽王羅公神道碑

齊光人

陳公神廟碑

裴導

陳公神廟碑銘

楊師立

數陳敬瑄十罪檄

蘇鶚

杜陽雜編序

欽定全唐文卷八百十三

陸希聲

希聲蘇州吳人商州刺史鄭愚表爲屬召爲右拾遺擢累
歙州刺史昭宗時入爲給事中拜戶部侍郎同中書門下
平章事以太子少師罷卒贈尚書左僕射諡曰文

唐太子校書李觀文集序

貞元中天子以文化天下天下翕然興於文文之尤高者
李元賓觀韓退之愈始元賓舉進士其文稱居退之之右
及元賓死退之之文日益高今之言文章元賓反出退之

之下論者以元賓早世其文未極退之窮老不休故能卒擅其名予以爲不然要之所得不同不可以相上下者文以理爲本而辭質在所尚元賓尚於辭故辭勝其理退之尚於質故理勝其辭退之雖窮老不休終不能爲元賓之辭假使元賓後退之之死亦不能及退之之質此所以不相見也夫文興於唐虞而隆於周漢自明帝後文體寢弱以至於魏晉宋齊梁隋嫣然華媚無復筋骨唐興猶襲隋故態至天后朝陳伯玉始復古制當世高之雖博雅典實猶未能全去諧靡至退之乃大革流弊落落有老成之風

而元賓則不古不今卓然自作一體激揚發越若絲竹中有金石聲每篇得意處如健馬在御蹠蹠不能止其所長如此得不謂之雄文哉自廣明喪亂天下文集畧盡予得元賓文於漢上惜其恐復磨滅因條次爲三編論其意以冠於首大順元年十月日給事中陸希聲序

道德真經傳序

大道隱世教衰天下方大亂當是時天必生聖人聖人憂斯民之不底於治而扶衰救亂之術作周之末世其幾矣於是仲尼闡三代之文以扶其衰老氏據三皇之質以救

其亂其揆一也蓋仲尼之術興於文文以治情老氏之術
本於質質以復性性情之極聖人所不能異文質之變萬
世所不能一也易曰顯諸仁以文爲教之謂也文之爲教
其事彰故坦然明白坦然明白則雅言者詳矣易曰藏諸
用以質爲教之謂也質之爲教其理微故深不可識深不
可識則妄作者衆矣夫惟老氏之術道以爲體名以爲用
無爲無不爲而格於皇極者也楊朱宗老氏之體失於不
及以至於貴身賤物莊周述老氏之用失於太過故務欲
絕聖棄智申韓失老氏之名而弊於苛繳刻急王何失老

氏之道而流於虛無放誕此六子者皆老氏之罪人也而世因謂老氏之指其歸不合於仲尼故訾其名則曰搥提仁義絕滅禮樂病其道則曰獨任清虛何以爲治於戲世之迷其來遠矣是使老氏受誣於千載道德不行於當世良有以也且老氏本原天地之始厯陳古今之變先明道德次說仁義下陳禮樂之失刑政之煩語其馴致而然耳其秉要執本在乎情性之極故其道始於身心刑於家國以施於天下如此其備也而惑者尚多云云豈不謂厚誣哉昔伏羲氏畫八卦象萬物窮性命之理順道德之和老

氏亦先天地本陰陽推性命之極原道德之奧此與伏羲同其原也文王觀大易九六之動貴剛尚變而要之以中老氏亦察大易七八之正致柔守靜而統之以大此與文王通其宗也孔子祖述堯舜憲章文武導斯民以仁義之教老氏亦擬議伏羲彌綸黃帝冒天下以道德之化此與孔子合其權也此三君子者聖人之極也老氏皆變而通之反而合之研至變之機探至精之蹟斯可謂至神者矣而王弼以爲聖人以道合體老氏未能體道故阮籍謂之上賢亞聖之人蓋同於輔嗣豈以老氏經世之迹未足充

其所言耶斯不然也於戲聖人之在世也有有迹有無迹
故道之不行也或危身歷聘以天下爲其憂或藏名飛遯
示世故不能累有迹無迹殊途同歸斯實道義之門非徒
相反而已然則仲尼之所以出老氏之所以處老氏之所
以默仲尼之所以語蓋屈伸隱顯之極也二子安能識之
哉司馬遷統序衆家以道德爲首可謂知本末矣班固作
古今人表乃詘老氏於第三品雖其名可詘而道可貶乎
哉於戲老氏之術見棄於當代久矣斯數子者之由也且
仲尼親見老氏歎其道曰猶龍乎從之問禮誠無間然著

在記傳後世不能通其意是以異端之說紛然蓋述之者不窮其源故非之者不盡其致噫斯傳之不作則老氏之指或幾乎息矣今故極其致顯其微使昭昭然與羣聖人意相合有能體其道用其名執古以御今致治如反掌耳自言老氏術者獨太史公近之爲治少得其道惟漢文耳其他皮傳詭說皆不足取吳郡陸希聲序

北戶錄序

詩人之作本於風俗大抵以物類比興達乎情性之源自非觀化察時周知民俗之事博聞多見曲盡萬物之理者

則安足以蘊爲六義之奧流爲絃歌之美哉由是言之則古之學者固不厭博博而且信君子難之東牟段君公路鄒平公之孫也自未能把筆愛以指畫地如文字及六七歲受學果能強力不罷其學九長仄僻人所不能知者薈乎羣籍之中乞乞然有餘力間者以事南遊五嶺間常采其民風土俗飲食衣製歌謠哀樂有異於中夏者錄而志之至於草木果蔬蟲魚羽毛之類有瑰形詭狀者亦莫不畢載非徒止於所聞見而已又能連類引證與奇書異說相參驗真所謂博而且信者矣噫近日著小說者多矣大

率皆鬼神變怪荒唐誕妄之事不然則滑稽詼諧以爲笑
樂之資離此二者或強言故事則皆詆訾前賢使悠悠者
以爲口實此近世之通病也如君所言皆無有是其著於
錄者悉可考驗此蓋博物之一助豈徒爲譚端而已乎君
以予往從事嶺南備覈其實請予序以爲證予嘗觀圖於
書府君狀貌一似鄒平公而又能以文學世其家於乎鄒
平公爲有後矣因爲之序而不辭右拾遺內供奉陸希聲
撰

周易傳序

予乾符初任右拾遺歲莫端居夢在大河之陽曠野數百里有三人偃卧東首長各數十丈有告者曰上伏羲中文王下孔子也三聖皆無言意中甚愕寤而震悸伏而思之河與天通圖之自出三聖衡列乾之象也天道無言示人以象天將以易道畀予乎由是考覈少小以來所集諸家注說貫以自得之理著易傳十篇傳上經爲第一下經爲第二所以列彖象之微辭測卦爻之奧義第三篇演文言之純粹以顯聖人之蹟第四篇伸繫辭之微意以彰易道之神第五篇原作易之始述列卦之序第六篇釋說卦之

義辨反對之相資第七篇窮畫卦象之由生著奇耦之極
第八篇明權輿律呂之末制作禮樂之原第九通天下之
理第十成天下之務別撰作易圖一卷指說一卷釋變一
卷微旨一卷又以易經文字古今謬誤又撰證一卷

君陽遁叟山居記

遁叟以斯世方亂遺榮於朝築室陽羨之南而遁跡焉地
當君山之陽東谿之上古謂之湖汙渚遁叟旣以名自命
又名其山曰頤山谿曰蒙谿將以頤養蒙昧也在易頤之
象☶艮爲山山下有震震爲雷爲龍頤山之下東走震澤

震雷魚龍之所萃毓有頤象焉蒙之象☶亦艮爲山山下有坎坎爲水爲險頤山之下泉流於險而達於大谿有蒙象焉一旦遁叟觴谿山之神於庭酌而飲頤山曰吾之所以命夫山之爲頤者勗子以養也子其養雲雨以潤物養霧露以生物養風霆以長物養雪霜以肅物養巨材以充棟宇養小材以爲蒸薪養茅管以爲茨籍養竹箭以爲器用養百果以充口腹養百藥以蠲札瘥養昆蟲使咸樂其生養鳥獸使各遂其性噫無或養妖雲悖雨以傷良稼養苦霧淫露以澤惡植養疾風迅雷以摧槁朽養慘霜虐雪

以殺根茲養擁腫之樸不爲幹材養鈎棘之藥不中樵爨
養蔓延之藟以困條柯養蟠梗之根以固膏土養弗食之
實以蕃庶生養雜毒之藥以中函氣養蟒虺蜂蜴以護巢
窟養豺狼梟獍以害羣類維山有神子其飲之無虧爾名
而窾爾實又酌而飲蒙谿曰吾所以命夫谿之爲蒙者昃
子以決也子其決於夷壤以發其源決於塞埴以通其流
決於腴畝以施其潤決於涸澤以溥其惠決於廣陂使介
鱗蕃育決於巨浸使蚪龍變化噫無或決於險阻以資其
悍激決於林藪以縱其墊溺決於舄鹵以嗇其施決於池

樂以專其利決於剛竇使龜蟹爲災決於沮洳使鼃鼃得志維谿有神子其飲之無喪爾名而浮爾實於是酌而自飲之吾之所以命是山也必將有所養也命是谿也亦將有所決也吾將養吾志於道而不希於世養吾行於德而不眩於俗養吾浩然之氣以合自然之英養吾誠明之意以入清明之蹟又將決吾心於仁義使不違決吾志於中正使不過決吾身於天命使不憂決吾迹於邈世使無悶如此而已遂與山谿揖讓竭吾歡而罷弁且歌曰山乎谿乎吾之心乎醒乎醉乎吾與汝參乎

仰山通智大師塲銘

自文宗朝有大馮山大圓禪師居士養道以曹溪心地直指示學人使入元理天下雲從霧集常數千人然承其宗旨者三人而已一曰仰山二曰大安三曰香巖希聲頃因從事嶺南遇仰山大師於洪州石亭觀音院洗心求道言下契悟元旨大師嘗論門人以希聲爲稱首及大師自石亭入東平會希聲府罷冒暑躡屨禮辭於巖下違師僅三十年師歸圓寂今者門人光昧專自東山來請予以文銘和尚塲予頃在襄州有香巖門人請予爲香巖碑已論三

人同體異用之意其辭曰仰山龍從於江西大安雨聚於
閩越香巖霰竄於南陽皆尋流得源同出異名之謂也達
道者皆以爲確論按西域秘記自達摩入中國當有七葉
草除其首是也仰山韶州人俗姓葉氏仰承六祖是爲七
葉然曹溪心地撥去文字不使染着而大師卽以曹溪元
旨印於大教莫不元符卽曹溪所云湛然常寂妙用恒沙
圓明變化不可揆測此所謂一體異用者予以香巖碑內
已曾論三師之旨故不得重言以俟知者今畧解釋以爲
增銘大師法名慧寂居仰山日法道大行故今多以仰山

爲號享年七十七僧臘五十四從國師忠和尚得元機境
智以曹溪心地用之千變萬化欲以直截指示學人無能
及者而學者往往失旨揚眉動目敲木指境遞相效數近
於戲笑非師之過也然師得曹溪元旨傳付學人雖與經
教符同了然自顯一道合離變化所謂龍從者也大師元
和二年六月二十一日生中和三年二月十三日入滅大
順二年三月十日勅號通智大師妙光之塏云爾乾寧二
年三月一日力病撰銘曰

大用如如合於太虛四大無主當歸享土以家爲塏終古

永樂千載之後靈光照灼

紇干濬

濬乾符時人

贈太尉韓允忠神道碑

天高地厚覆載之道成君聖臣賢教化之功普帝唐以文

德走殊俗以武經齊諸夏訐謨

下闕

張之全才兼將相之重

位藝通神化氣肅風雷建曠代之勲庸爲一時之標表者

則魏帥丞相韓公其爲人

下闕

萬食采於韓因以定氏在春

秋時有韓厥事晉獻公能全趙氏之孤不忝上卿之位左

氏書之在嬴秦時有韓仰為太傅闕下一朝信生類當封弓

高侯在東漢時有韓稜為尚書令清名直節獨立不黨在

東晉時有韓康伯幼闕一聰悟早遇殷浩見知長負闕下皇

室闕下無人是知源深則派長根大則枝茂蟬聯冠冕世享

厥位曾王父朝皇魏博臨清鎮都知兵馬使闕一度奇表

巍然闕一殊不器之闕下雲闕下夫檢校太子賓客使持節相

州諸軍事守相州刺史充本州防禦使御史中丞且習鈴

經通知政術桓石虔名能斷闕一許仲闕一力可闕一犇

尋闕一軍闕下相州府闕下以公追孝贈工部尚闕三祖妣張

氏追封清河郡太君皇考

闕一字

銀青光祿大夫檢校國子

祭酒使持節

闕一字

州

闕一字

軍事守

闕一字

州刺

闕四字

防禦使

下質勁百鍊

闕下

克肖門風飛一箭以下城穀虛弓而墜鳥

洞曉邊事不後郭公又好讀兵書寧慙奉世初從將幕遂

拜魚符頒六條以

闕一字

城駕

闕一字

而

闕四字

行足以軌物

闕一字

字厲足以範人位不

闕下

公貴累贈

闕下

部尚書妣吳氏追封

涼國太夫人公則貝州府君之元子也才惟命世生實為

時天縱多能人推懿範孔子聖者似

闕一字

能下公學窮三

豕箭

闕下

以自強蓄鋒鏑而不

闕下

終軍童子便請長纓李牧

少年樂從絕塞始辭外傳遽列和門竭力奉公所至必理

蔣琬占夢之日已定封公謝安未仕之辰終期作相承

字

邦

之餘祉

字

文明之

字

一代

字

德

字

壯圖

字

乎

武幕位崇連營任顯入軍旅必以謀畧資其長行鄉黨必

以教義諭其幼諸葛亮有管仲之器趙真卿多白起之風

立於尉庭不雜流輩

字

行太尉范

字

公愛公堂堂之

闕聞謂公曰

字

韓與何本同族氏我欲投忘年之分申一

姓之驩可乎公再拜牢讓不從其意謙之至也

字

武宗

四年潞帥死其子稹

字

一方積

字

長

字

天子赫

字

天子赫

字

廟堂陳帷幄亟下詔書大徵師旅不日而戈鋌四合浹旬

而魏武爭先歲序俄周堡障未下蓋以前據壺關之固後

倚太行之險王師

下關

士庶

闕一字

夷於鋒

下關

防密壇鴟鵂雜

金鼓之聲雲物慘山川之色徒拗其怒且無所施乃召耆

將計事皆曰眾寡不敵利病相懸公獨忿勇出羣請借前

籌

下關

作虐西境

下關

照大

闕二字

有

下關

方地居屏捍當閭外之

寄分天子之憂苟或不能整一旅之師問滔天之罪是倒

持而授柄焉可恣其暴也遂請楚公上表

闕一字

師躬行天

伐楚公持重

下關

公又曰雖

下關

眾兵家所慎而杖順討逆神

道必從况牙不觸邪與羊無別較然之理又何疑哉楚公

雖聽機謀尚懷猶豫

闕二

御史中丞李公

闕一

乘

闕三

街

命宣

闕下

西嚮

闕下

恩始議伐叛顧謂公曰前日之言若合符

契非公智識精遠孰能懸解天意乎由是練日選

闕三

出

燾

闕下

公素甫廣順

闕下

陣孤虛傳宏之氣冠三軍公孫瓚聲

聞步奮身於行伍之衆泣誓於義勇之徒且曰帝命不可

稽隣寇不可玩

闕三

慮事今

闕下

戈

闕一

山立

闕二

雲屯

闕一

字

霧忽

闕下

壘先驚公不顧危亡親承矢石介冑蟣蝨手足

胼胝趙充淑名動寰區共推烈士張文遠身先士卒果立

殊功

闕一字

威無

闕二字

之

闕一字

戰陳忘

闕二字

之

闕三字

朝渡一

闕二字

壘於

闕二字

夕起長風

闕一字

浪

闕下

將席

闕下

山頽或倒戟

自殘或輿屍請命然後化狼顧鳴張之輩爲鳳儀麟趾之

祥蕩穢滌瑕冰消燼滅捷書西上褒詔東來

闕下

公上報明

主次

闕下

旋獲

闕下

壯志嗚呼楚國公用公籌畧卒建大功天

子酬勞就加外相御史中丞李公復因楚公之

闕下

寵光亦

拜台

闕一字

惟公止換憲秩稍遷

闕下

有

闕下

突徙薪之歎而我

無矜功利已之心坦然胸襟益見夷曠公挹江海之偉量

挺倜儻之奇姿文次騫智敵萬

闕一字

顧彥

闕一字

名齊

闕下

闕二 問望藉藉動人視聽闕下廬江公紀綱失守時今上在

東宮爲晉王卽宣詔遙領魏博節度使授公銀青光祿大

夫檢校闕一常闕下節度觀察畱闕三慰諭闕下道路公瞻天

頓首慝懇堅讓紫泥重降莫得而辭踰月拜檢校工部尚

書魏州大都督府長史充魏闕一節度觀察闕二等闕五

復拜闕三內使以旋闕下雷動五營義武六郡疲民稚舞艾

歌相與賀曰邵父杜母復出於今日則人人皆得爲赤子

矣公寵踐將壇榮分朝闕下丕變教令載新近闕下皇風普扇

惠澤遐敷熙熙怡怡不嚴而理迨朞月報政特加尚書右

僕射餘如故師長南宮儀刑會府酬庸旌德賞典有光

闕四

字檢校司空闕下諱臨軒遣使與司空之命同賜渥澤薦加

恩榮特異比於羣后孰可擬倫今上卽位勅覃恩中外

闕下

維舊土朕闕一居闕下契君臣之分加同中書門下平章事

檢校司空如故公位尊鼎鼎寄重方隅周勃社稷之臣漢

朝禮厚桓楷棟梁之闕一蜀國名高感孚人心闕五使闕三

字鳥闕三修闕下保其安賦有常期官無橫役而又立鄉校

以勸學敦儒術而獎善完器甲以彰有備訓卒伍以示有

嚴解闕一迎賓分甘饗士茂綏懷之闕下泰闕下之是非不出

於闕字 一 心之喜愠不形於色肅恭之貌若待嚴師信厚之

誠不欺暗室矧復地隆千乘日食萬錢而素儉之規無所

增益雖闕下 常閱詩書吉甫之不墜文武太叔之美秀子產

之博物石奮之謹厚充國之雄敏皆不學而成得自生性

亦猶張瑟於庭風至而韻自闕下 納萬機闕下 乾符元年十一

月廿二日遘疾薨於鎮享年六十一傾都罷市闔境興哀

孫文度之喪神仙赴弔王子敬之歿人琴俱亡皇帝闕下 郎

中曹鄴太子闕下 議大夫李景莊庫部員外郎陳翰備鼓吹

升輅車由宣政正衙及公之靈座冊贈司徒諡曰闕一 明

字

年以我僕射闕下因心之孝感應闕下公前娶夫人劉氏追封

彭城郡太君文伯之妻君子爲知禮孟軻之母良史述其

賢淑行無徵華年早世後娶夫人靳氏封清河郡君闕一

先公而歿下有子軍守左金吾衛大將軍員外置同正

員檢校尚書右僕射兼魏州大都督府長史御史大夫上

柱國賜紫金魚袋天上麒麟人間鸞鳳闕三孝闕一純

深闕下列於貳車推誠而六郡闕二修已而萬人有賴及朝

廷聞公薨謝星使遽臨慰於苦幽之前勉以金革之事遂

授僕射起復魏闕一節度闕一察畱後檢闕下之權恩洽宸

襟使來天闕碧幢照耀紅旆逶迤禮莫重於奪情榮莫大

於緒嗣僕射叩闕三字 洩血陳乞敢忘移孝之闕下僕射去經

捧詔易闕一字 從政恭臨舊地敬奉先勲紹遺愛於師壇襲

垂闕一字 於揆路禮闕一字 可以肅物清儉可以律人無綺紈

矜闕一字 之心闕一字 鉦鼓闕下河永傳帶礪次子記前魏州都

督府文學幼子諫親事將闕一字 早奉義方夙承家誨粵以

明年二月廿五日卜兆於魏州莘縣修善鄉平原闕先塋

之側啟闕下公懿行崇勲為世軌範苟闕一字 紀述何慰孝思

遂命門吏紇干濬刻石為碑以示來裔濬伏念昔者延陵

季氏仲尼署其表曰嗚呼有吳季子之墓則知碑者古史
之流闕下銘合屬曳裾之吏濬叨蒙原顧獲忝初筵胡伯始
之前修無慚許訓郭有道之遺烈徒感蔡邕寧愧蕪詞敢
書貞礎銘曰

元聖乘運英賢膺期生爲邦傑出作帝師赫赫韓子徽猷
早振得姓於周筮仕於晉旣開土宇亦佩侯印闕一漢承

字闕一淮陰封信洪源茂緒派遠闕下克紹祖宗量寬溟漲威

定山東爰自壯年誓志從戎鈐經政術靡有不通凌雲直

幹襲物清風紫髯短下黑闕一琬弓闕二挺衆闕四狸穴

下若刃自戕若火自燎太行天井恃險設與逆浪晝翻旄

頭夜耀天子問罪楚公奉詔公實為副順行天討下羣校

闕二齊駟騶馳雷掃下執銳披堅屠城擒將所向無全探

雛撲卵流血成川妖孽既平功成凱旋勲高名顯時望赫

然鸞鶴騰闕一蛟龍擘闕二天萬里一日可上齋壇使節

下位重廊廟任尊師長化洽令行人歌惠養天垂將星公

實稟之神有兵符公實受之元凶巨猾公實定之帝闕一

王闕一公實佐之闕一家許國濟難匡時下晉侯言命兩

楹夢奠夫子殆病皇天匪信倚伏無定梁壞舟藏孰為龜

鏡史氏書歿禮官考行終始哀榮

闕下

松楸已列體魄宜安

西眺崇山崇山言言南臨大河大河渾渾山河永固基業
長存

公乘億

億字壽仙咸通末進士

復河湟賦

上闕左衽之心庶無虞於魏闕足以談元想播洪休使恩波

之不絕令瑞色以長浮帳下美人醉舞胡筵之夜天邊戍
客行歌隴月之秋況在秦則秦之無策在漢則漢之莫克

恨旄頭而夜夜長懸怨羽檄而年年不息爰及我后混成
區域自然與三代同風百王作式若臣者則何足以論功
而贊德

魏州故禪大德獎公塋碑

蓋聞妙諦惟元不可以一理測真筌至奧不可以諸相求
隨萬物而泯色空而不生不滅超三界而越塵垢故無去
無來此乃不思議者其惟西方釋迦牟尼佛之謂乎伏自
教傳西域化被中原漢明推入夢之祥梁武顯施身之願
語其大也外不見須彌之廣言其小也內不知芥子之微

斯乃梵璽哀然代代相付肇自摩訶迦葉迄於師子尊者
統爲二十三代而後達摩多羅降於漢土至能秀分之爲
七而後苞披葉附派別脉分其真宗不泯不滅者則我大
覺大師固有系焉和尚姓孔字存獎家本鄒魯卽闕里之
裔孫也乃祖乃父因官隸於薊門厯祀旣深籍同編人和
尚以無量劫中修菩薩行及茲降世豈同凡倫當衣采之
妙齡蓄披緇之大志未踰七歲卽悟三乘啟白所親懇求
剃落遂於薊三河縣盤山甘泉院依止禪大德曉方乃親
承杖履就侍瓶盂啟顧全身惟思半偈大中五年伏遇盧

龍軍節度使張公奏置壇場和尚是時戒相方具而後大中九年再遇侍中張公重起戒壇於涿郡眾請和尚以六踰星紀三統講筵宣金石之微言示玉毫之真相三千大千之世界靡不瞻依十一十二之因緣竟無凝滯禪大德元公者卽臨濟之大師也和尙一申禮謁得奉指歸傳黃蘗之真筌授白雲之祕訣所爲醍醐味爽乍灌頂以皆醒薝蔔花香纔經手而分馥一旦旋辭舊刹願厯諸方西自京華南經水國至於攀蘿冒險蹈石眠雲經吳會興廢之都盡梁武莊嚴之地無不追窮聖迹探討朝宗後過鍾陵

伏遇仰山大師方開法宇大啟禪局赴地主之邀迎會天
人之供施面陳奧義眾莫能分和尚立以剖之如刀解物
仰山目眙擊指稱歎再三遽聞臨濟大師已受滿相蔣公
之講纔疑省侍飛錫而遽及中條尋獲參隨置杯而將渡
白馬當道先太尉中令何公專發使人迎請臨濟大師和
尚翼從一行不信宿而至於府下而乃止於觀音寺江西
禪院而得簪裾繼踵道俗連肩曾未期年是至遷化斯蓋
和尚服勤道至展敬情深無乖靈堵之儀克盡茶毗之禮
云乾符二年有幽州節度押兩蕃副使檢校秘書兼御史

中丞賜紫金魚袋董廓及幽州臨壇律大德沙門僧惟信
并涿州石經寺監寺律大德宏嶼等咸欲指陳盤嶺祈請
北歸和尚欲徇羣情將之薊部晨詣衙庭啟述行邁先時
中丞韓公之叔曰贊中遽聞告云撫掌大敬迺曰南北兩
地有何異也魏人何薄燕人何厚如來之敬豈如是耶和
尚辭不獲已許立精舍韓公之叔常侍及諸檀信鳩集財
貨卜得勝槩在於南甌門外通衢之左成是院也有如化
成松栢將杞梓俱來文石與礧礧游至重廊複道竹翠松
青四戶八窗風輕月朗和尚樂茲幽致用化羣迷開解脫

門演無量法能使天花散地水月澄空常與四衆天人皆臻法要六州士庶盡結勝因豈謂一念俱尸奄從物化斯乃文德元年七月十二日也享齡五十九僧臘四十一有親信弟子藏暉行簡一以主喪一以傳法大德奉先師之遺命於龍紀元年八月二十二日於本院焚我真身用觀法相闔城禪律繼踵爭來四達簪裾連肩悉至於是幡花蔽日螺唄喧天火纔發而雲自愁薪不加而風助勢三日三夜號禮如斯於香燼之中得舍利一千餘粒諸寺大德各各作禮請分供養焉於戲雪氎如故其儀宛然捧一履

以徒悲仰雙林而莫見遂建塏於府南貴鄉縣薰風里附
於先師之塏志也億到職之初曾獲瞻禮法主大德藏暉
不以億才業庸淺具聞於我公相請撰斯文億秉筆惕然
得盡蕪鄙銘曰

傳如來教厥惟大雄百千劫外方丈室中慈悲是念色相
皆空端然不動豈染塵蒙矯跡三界安心四禪身雖是假
道本無邊璞內有玉火中生蓮傳法何處隨其有緣越絕
支遁匡廬遠公高情遠致跡異心同旣離邪縛肯處凡籠
松軒竹徑空悲夜風我性不動我心就然果得舍利粒粒

珠圓幡花豔閃螺唄交連唱偈作禮聲徹梵天寶刹新建
招提舊蹤蓮芳不見葱嶺誰逢響亮朝磬清泠夜鐘歷千
萬祀傳我禪宗

唐太師南陽王羅公神道碑

上關公父下刺史下山關一關都知兵關二關兼御史大夫烈考

諱珍魏博節度押衙親事廂虞候公少立奇節倜儻不羣
交結時豪輕死重義雖鷄鳴狗盜靡間於交遊馬圉牛醫
不忘於禮敬自此鄉閭畏愛遐邇來投伏自何中令時以
公正直致於肘腋洎韓太尉日以公謹愿委之心腹雖處

上不驕臨下不暴凡平昔交契未嘗暫忘有卻氏分財之
仁有汜毓字孤之義屢移星瑄一致如斯嗚呼乾符三年
六月十一日遘疾薨於寬仁坊之私第享齡六十九遂使
白日藏耀重雲結陰里巷停春行路增歎當年十一月二
十四日遷宅兆於貴鄉縣迎濟鄉蔡林禮也蒙恩賜工部
尚書

齊光乂

光乂乾符初官集賢院學士

陳公神廟碑

在昔隋氏喪君齊人乏主代厄淪胥我大將運匡救之謀
先州里之義存乎蔽捍用伺昭蘇初志未躋良圖奄墜災
生福始遺恨如何公諱果仁字世威誕受丕祉其昌來裔
有媯之後人莫與京洪惟發靈乃降時傑鼎角匿犀之異
雄深魁武之姿貫藝造奇無所不至立能事於艱虞之際
建殊蹤於混亂之秋韞義生風鼓動流俗全吳之地幸賴
以安招定鄰邦輯寧徒旅江湖嚮應懷赴如歸沈法興率
衆而來假我鼻息初規景附末肆傾夷因何匪仁暴戾斯
甚自遺覆敗竟取淪亡至於敘官遊歷系業事咸不朽跡

著無方名與日月輪迴功隨載籍舒卷已詳於宣法師所製寺碑若乃生志未盡餘勇仍存息氣沴於疵癘降精靈於巫覡物靜哉異時無天昏人到於今罔不懷德每以公之諱日爰伸仲夏之中展祀建齋所在充遍雖掃地以祭且貴懇誠而廟宇未崇寧昭節敬邑老慶州都督府永清府左果毅都尉上柱國賜緋魚袋張智景與福業寺長老義先等聚族而謀發言同人不召而萃邑中之衆實慰我心疇其經營委以財物始則運思而斲之丁丁終於用成而新廟奕奕座盈神氣侍列鬼雄威深沈以肅然狀煜爚

而疑動有以底明祇之位有以昭介祉之儀及夫沐蘭湯
奠椒醕揚枹拊鼓緩節安歌華彩服與瓊芳會陳巫與楚
舞求非曲禱祀必正辭無紛若之言致馨香之信由是上
感宸心旁追祀典降中使被懷濡聖澤覃溥天光照爛豈
秦祠漢享之類可得同乎浹逮下之祈演無疆之助或飲
食有訟或契文不明凡百無良深衷莫辨微見誠請立彰
其效負者乃凶竟貽潛慝攘諍掩息望境自清比夏積愆
陽秋淫霖雨捨我穡事妨於農收至於三至於四時其賢
守李公行穆民勤卹之意傍徨匪寧率領官屬長史李公

昌岨司馬邱公從心晉陵縣令岑公况武進縣令何公據等果至虔誠景刻俱應澤及千里無所不周使君涵道德之尊豐惠和之厚艱難之辰晏然無事豈不以忠信於物而昭明於神乎本宰何公學以入政優于予人深撫育之恩流清白之稱咸思善貺冀答宏慈神之聽之庶同景福今餘寇未寧尚煩翦滅神而助順靈其運乎昔者聖王之制禮能禦大災能捍大患以勞定國以死勤人則所必祀而明德報功大將生爲司徒足以主世地歿爲貴神足以鎮邪惡間閭綏祐存亡以之斯所以榮尊故鄉廟食舊國

宜矣勒懿迹策豐珉延光表美寧可闕歟光又策名清時
亞位書府宦遊日久遲暮言歸竊井邑之譽忝文章之目
魯無君子斯焉取斯以爲傳芳金石不可妄也郡司錄裴
公導翰林之寶辭推典麗請以頌記其銘此君爲之

裴導

導乾符初官常州司錄

陳公神廟碑銘

烈烈司徒爲王爪士勇冠諸軍義先州里三綱砥節百行
推美所謂伊人南國之紀天厭火德運歸黃祚肇闢乾關

未康國步鯨鯢振海楔窳交路偃草江干惟夫子故矛鎚
挺擊萬里長城旌旄血灑劍鏑風生夸者貨首同焉盜明
雄心不竭終古英靈依然甲第尚想陳跡庭變金地祠開
瑤席曰雨曰霽推誠邦伯

楊師立

師立僖宗朝爲東川節度使初隸神策軍累遷檢校司空
同中書門下平章事陳敬瑄欲以楊仁厚代諷帝召之師
立怒移檄言敬瑄十罪遣兵攻綿州帝下詔討之戰敗爲
其下鄭君雄所殺

數陳敬瑄十罪檄

伏聞庖丁解牛鑿骨節於形外伏波聚米察山谷於目前
若匪通人奚臻妙理師立材非馬援智乏庖丁見率土之
啣冤爲大朝之雪恥今國家以黃巢肆逆寓縣罹災鑾輿
播越而未安宗廟凌夷而失守凡在臣子孰不痛傷而西
川節度使陳敬瑄因守藩維坐觀成敗伏自大駕駐蹕縱
令羣盜害人不能行政理以安時但欲示軍功而駭眾只
要威權在已冀令朝野歸心惡旣貫盈人皆憤惋聊書十
罪用去一凶實望此時共垂詳悉且功高者祿重德厚者

位尊敬瑄本自凡庸素無智略事因際會位極人臣乃至稚女孩童皆霑寵祿閨房阜隸並受渥恩使功勲者切齒而不言勞舊者扼腕而懷恨其罪一也獻可替否必在忠言指佞觸邪須憑直士張侍御正朝廷綱紀暗被誅夷孟拾遺疏奸惡是非遂遭陷害或隕命於滄江之下或亡軀於幽室之間想其彊死之孤魂必得申冤於上帝自此中外結憤愚智吞聲其罪二也妄議公主擅許和親挫大國之威風長南夷之僥倖蓋緣陳敬瑄受賂遂令海內興譏其罪三也恭顯兄弟總非勲校皆食厚祿並陟崇階蓋陳

敬瑄罔顧刑章黷亂朝憲外姻內族冒貴貪榮其罪四也
全無懼謗豈識廉隅但興苟且之心惟恣淫佚之行昇徐
賡爲公座因令奪安鄴之妻致光庭登科甲只爲聘敬瑄
之女聞之者寧無慙恥見之者皆有歎嗟其罪五也鄭相
公運籌於岐隴率衆於邠涇橫控梁洋遂安劔蜀敬瑄深
懷嫉妬互起讒言其罪六也王蘊賤隸之徒姚坤凶狀未
具皆被殺戮可鑒幽冤賞罰之權自敬瑄出其罪七也恣
行威福紊亂規繩除移不自於天書擢用只憑於使牒元
隨諸校偏受官榮扈從六軍曾無優渥其罪八也搜羅富

戶借彼資財抑奪鹽商取其金帛三倍折納稅米兩川絀斷度支妄指贍軍多將潤屋其罪九也東西二蜀節制狗意誣君云討韓秀昇峽路迴戈請擊高仁厚當川歇馬不甘下視可驗平欺如此用心自爲得計其罪十也且爲臣之義有一於此未或不亡況皆具之何以能久師立今則感人神之怨怒奮貔虎以平除已點驍銳精兵及八州壇寨共五萬人騎舉義長驅問罪西府志在扶持天子誅滅亂臣止欲生致敬瑄而奏聖上請行國典以正朝綱應檄諸道公侯諸州牧伯共期嫉惡同爲除奸或義士忠臣或

川府將校但能梟敬瑄首級送師立軍前卽便卷甲弢弓
歸朝謝罪皇天后土實聞此言凡在人臣幸鑒忠懇

蘇鶚

鶚字德祥京兆武功人光啟二年進士

杜陽雜編序

予髫年好學長而忘倦嘗覽王嘉拾遺記郭子橫洞冥記
及諸家恠異錄謂之虛誕而復訪問博文強記之士或潛
夫輩頗得國朝故實始知天地之內無所不有或限諸夷
貊隔於年代洎貢藝闕下十不中所司掄選屢接朝事同

人語事必三復其言然後題於簡冊藏諸篋笥暇日閱所紀之事逾數百紙中僅繁鄙者並棄而弗錄精實者編成上中下三卷自代宗廣德元年癸卯訖懿宗咸通癸巳合一百一十載蓋耳目相接庶可傳焉知我者謂稍以補東觀緹油之遺闕也今武功縣有杜陽城杜陽水予武功人故以爲名覬廁於談藪之下者時乾符三年秋八月編次焉

欽定全唐文卷八百十四目錄

樂朋龜

蕭邁判度支制

王鐸宏文館大學士等制

王鐸中書令諸道行營都統權知義成軍節度使

制

賜陳敬暄太尉鐵券文

西川青羊宮碑銘

僖宗皇帝哀冊文